

14. Oktober 2025

UKA2025/58

Kalaallit Nunaanni piffissap suliffiusartup sapaatip akunneranut nalunaaquttap akunnerinit 40-nit sapaatip akunneranut nalunaaquttap akunnerinut 35-inut 37-inulluunniit appartinneqarnerata aningaasaqarnikkut, inuiaqatigiinnut peqqissutsimullu kingunerisassaanik misissueqqullugit Naalakkersuisut peqqunneqarnissaannik Inatsisartut aalajangiiffigisassaattut siunnersuut. Misissuinerup inernerá 1. januar 2027-iutinnagu Inatsisartunut agguanneqassaaq.

(Inatsisartunut ilaasortaq Karen Marie Kyed Frederiksen, Demokraatit)

Siumut sinnerlugu, siunnersuuteqartumut Karen Marie Kyed Frederiksen-imut soqutiginarumut qaqitannut qujanaq.

Siumumiit tunngaviusumik anguniagaraarput sapaatip akunneranut akunnerit 37-t suliffiusalernissaat. Taamaattumik siunnersuuteqartup qaqitaa ilassilluarlugu, inuiaqatigiinnut aningaasaqarnikkut peqqissutsikkullu kingunerisinnaasaanik misissueqqusinera ilalerlugulu akuerigatsigu oqaatigissavara.

Taamaakkaluartoq isumaqarpugut suli paasisaqarluarnerorusulluta sunniutigisinnaasaanut. Nunat qanitagut naalagaaffioreersut, soorlu Danmark Islandilu, matuminnga misilittagaqarlutut ilanngullugit qanoq inuiaqatigiinnut sunniuteqarsimanerat qissimilaassallugu paasisassarsiorfigissallugillu pisariaqarpoq.

Siunnersuuteqartup eqqaasaattut aningaasaqarnikkut ajorseriaataannginnissaa aamma timimusialinnut annaasaqaataannginnissaa eqqartorluassallugit pisariaqassaaq.

Tamatuma itisilerlugu paasisassarsiorfiginissaanut kattuffiit SIK-tut ittut aggersarlugit nassuiaatinneqarsinnaapput, aamma peqqissutsimut pitsaaqutai ajoqutaasinnaasullu sulinermit avatangiisinut tunngasunik nassuiaatitsinikkut qulaajagassanut sakkuulluarsinnaammata, Siumumiit kaammattuutigissavarput tamakkua peqataatinneqassasut qulaajaanermi.

Sulisartunut akissaatit minnerulersinneqannginnissaat pingaartutut isigaarput, taamaammallu inatsit atuutsilersinneqassagalarpat kingunissai tamakku ilanngullugit qulaajartariaqarpagut. Aamma Sullivinnik Nakkutilliisoqarfik qularnaatsumik peqqissutsimut il.il. sunniutissat pillugit qulaajaalluarnissaat pisariaqarsinnaavoq.

Ullumikkut SIK naapertorlugu akissaatillit amerlanersaat sapaatip akunneranut 40 timinik sulisarpur. Sulinerlu 37 timinut appartinneqassappat – sapaatip akunneranut akissaatit soorunami allanngortinnagit – sulineq 7,5 procentimik appartinneqassaaq. Allatut aamma oqaatigineqarsinnaavoq. Suliaq taanna 7,5 procentimik akisunerulissaaq.



Tamannalu pitsaaqutissarpassuaqarpoq, assersuutigalugu sulineq oqimaaqatigiinnerulersinnaavoq, akunnermut naammassisartakkat annertunerulersinnaapput, suliffik orniginarnerulersinnaavoq aamma ilaqtutanut piffissaqarnerusoqalersinnaavoq.

Torrutiinnarluguli taamak nalilersuinermi ilanngunneqartussat tassaapputtaaq aningaasartuutaanerulertussat. Tassami assersuutigalugu aalajangersimasumik ammasartussat eqqarsaatigissagaanni, soorlu utoqqaat illui allallu kiffartuussiviit, taakku 7,5 procentimik sulisoqarnerulernissamik pisariaqartitsilissapput.

Taamaammat siunnersuuteqartup misissueqqusinera Siumumiit taparserparput, isumaqaratta alloriarnissamut ilisimasassavut katersorlugit aallartittariaqartugut. Uaniluunniimmi qaammammusiallit assersuuteqarfiginngikkaluarlugit, taakku aamma assingusumik inissisimasussaassapput.

Siumumiit qulaani taasagut ataatsimiititaliami eqqartorluarneqassasut qulaajarluarneqassasullu kissaatigaarput, siunnersuullu Inuussutissarsiornermut Ataatsimiititaliamut ingerlateqqillugu, sulilluarnissaanik kissaappagut.

Anders Olsen
Siumut